

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 9/6

17 մայիսի 2016 թ.

Քննարկվեց «Ֆրենդս Մենեջմենթ Գրուպ» ՍՊԸ գանգատը ՀՀ ԿԱ ՊԵԿ աշխատակազմի իրավաբանական վարչության պետի 08.04.2016թ-ի թիվ 317485/02 որոշման դեմ:

«Ֆրենդս Մենեջմենթ Գրուպ» ՍՊԸ գանգատում բերված փաստարկները.

«Ֆրենդս Մենեջմենթ Գրուպ» ՍՊԸ-ն (Ընկերություն) հիմնադրվել է 25.11.2015թ.: Ընկերությունը փաստացի սկսել է գործունեություն ծավալել 08.12.2015թ-ից՝ Վարդանանց 15/5 հասցեում իրականացնելով առևտրային գործունեություն սննդի, ալկոհոլի և սպասարկման ոլորտում:

23.02.2016թ. ՀՀ ՖՆ Կենտրոնի հարկային տեսչության պետի թիվ 6120107 հանձնարարագրով Ընկերությունում իրականացվել է հսկիչ գնում, որի արդյունքում հայտնաբերվել է ժամկետանց ակցիզային դրոշմանիշով 1 շիշ գինի: Նույն օրը կազմվել է արձանագրություն՝ հայտնաբերված խախտման վերաբերյալ, իսկ 24.02.2016թ.՝ թիվ 6120107 ակտը: 08.04.2016թ. թիվ 317485/02 որոշմամբ Նարեկ Նազարյանը Վարչական իրավախախտումների վերաբերյալ ՀՀ օրենսգրքի 170.12 հոդվածով ենթարկվել է վարչական տույժի՝ գումարով 600.000 դրամի չափով:

Ժամկետանց դրոշմանիշով ապրանքն ընկերությունը ձեռք է բերել 2015թ., երբ դրա վաճառքը դեռ թույլատրելի էր, այսինքն՝ դրոշմանշված էր 2011 թվականի դրոշմանիշով: Լինելով անփորձ անուշադրության է մատնվել 2011 թվականին դրոշմավորված միակ ապրանքը և այն մնացել է վաճառքի սրահում, ինչը նկատել են ՀՀ ԿԱ ՊԵԿ-ի տեսուչները՝ հսկիչ գնում կատարելիս: Հատկանշական է, որ դա միակ շիշն է եղել, որի դրոշմանշումը եղել է օրենքի խախտումով:

Բացի այդ, «Ակցիզային հարկով հարկման ենթակա որոշ ապրանքների դրոշմավորման համար «2011» թվագրմամբ ակցիզային դրոշմանիշերը կիրառությունից հանելու և «2011» թվագրմամբ ակցիզային դրոշմանիշերով դրոշմավորված ապրանքների իրացումն արգելելու մասին» ՀՀ կառավարության 22 ապրիլի 2015 թվականի թիվ 416-Ն որոշմամբ, 2011 թվագրումով դրոշմանիշերի կիրառումն արգելվել է սկսած 01.01.2016 թվականից, այսինքն՝ վերը նշված խախտումը թույլ է տրվել արգելքի ուժի մեջ մտնելու պահից շուրջ երկու ամիս անց և դա ևս պատճառ է հանդիսացել Ընկերության աշխատակիցների կողմից խախտումը չնկատելու համար:

Այսպիսով՝ Ընկերության գործունեությունն սկսելուց ընդամենը 3 ամիս անց կիրառվել է 600.000 դրամի տուգանք, այն պարագայում, երբ Ընկերությունը դեռևս չի կարողանում ոտքի կանգնել ինտենսիվ առևտրի բացակայության պատճառով, իսկ եղածով մի կերպ կարողանում է հոգալ իր ծախսերը:

Ընկերությունն ի վիճակի չէ վճարել 600.000 դրամ տուգանք այն դեպքում, երբ 2016 թվականի 1-ին եռամսյակում Ընկերության եռամսյակային շրջանառությունը կազմել է 1.685.823 դրամ, որից 180.000 դրամ վճարվել է որպես արտոնագրային

վճար, 150.000 դրամ՝ եկամտային հարկ, վճարվել են աշխատավարձեր, վարձավճարներ և ընկերությունը գրեթե շահույթ չի ստացել:

Հաշվի առնելով վերը նշվածը և Վարչական իրավախատումների վերաբերյալ ՀՀ օրենսգրքի 33-րդ հոդվածի 1-ին կետը, գանգատաբերը խնդրում է վերացնել ՀՀ ԿԱ ՊԵԿ աշխատակազմի իրավաբանական վարչության պետի 08.04.2016թ-ի թիվ 317485/02 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ Կենտրոնի ՀՏ պետի 23.02.2016թ. թիվ 6120107 հանձնարարագրի համաձայն «Ֆրենդս Մենեջմենթ Գրուպ» ՍՊԸ-ում կատարվել է ակցիզային դրոշմանիշերի կիրառման ճշտության ստուգում: Արդյունքում կազմվել է ՀՀ ՖՆ Կենտրոնի ՀՏ 03.03.2016թ. թիվ 6120107 ակտը, որի 1-ին կետով մասնավորապես արձանագրվել է հետևյալը.

23.02.2016թ-ին ք.Երևան, Վարդանանց 15/5 հասցեում գործող «Ֆրենդս Մենեջմենթ Գրուպ» ՍՊԸ-ին պատկանող մանրածախ առևտրի կետից կատարվել է 10.900 դրամի գնում՝ գնվել է 1 շիշ 0.75լ տարողությամբ ֆրանսիական կարմիր չոր գինի, որը դրոշմավորված է եղել 2011թ. թվագրումով ակցիզային դրոշմանիշով:

Այնուհետև, ՀՀ ԿԱ ՊԵԿ աշխատակազմի իրավաբանական վարչության պետը, քննելով թիվ 1735 վարչական իրավախախտման գործը և ուսումնասիրելով 08.04.2016թ-ի արձանագրությունը պարզել է, որ «Ֆրենդս Մենեջմենթ Գրուպ» ՍՊԸ տնօրեն Նարեկ Նազարյանը, համաձայն ՀՀ ԿԱ ՊԵԿ Կենտրոնի ՀՏ 03.03.2016թ. թիվ 6120107 ակտի, իրացրել է ապրանք, որի վրա փակցված է եղել ժամկետանց ակցիզային դրոշմանիշ: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 170.12-րդ հոդվածով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ԿԱ ՊԵԿ աշխատակազմի իրավաբանական վարչության պետի կողմից 08.04.2016թ-ին ընդունվել է վարչական իրավախախտման գործի վերաբերյալ թիվ 317485/02 որոշումը (այսուհետ նաև Որոշում), որով Նարեկ Նազարյանը ենթարկվել է վարչական պատասխանատվության՝ գումարով 600.000 դրամի չափով:

Վերոգրյալի կապակցությամբ հարկ է նշել, որ ՀՀ կառավարության 22 ապրիլի 2015 թվականի N 416-Ն որոշման 1-ին կետի համաձայն՝ 2015 թվականի հուլիսի 1-ից կիրառությունից հանվել են Հայաստանի Հանրապետություն ներմուծվող կամ Հայաստանի Հանրապետությունում արտադրվող՝ ակցիզային հարկով հարկման ենթակա որոշ ապրանքների դրոշմավորման համար «2011» թվագրմամբ ակցիզային դրոշմանիշերը:

Նույն որոշման 2-րդ կետով սահմանվել է, որ 2016 թվականի հունվարի 1-ից Հայաստանի Հանրապետությունում արգելվում է Հայաստանի Հանրապետություն ներմուծված կամ Հայաստանի Հանրապետությունում արտադրված՝ «2011» թվագրմամբ ակցիզային դրոշմանիշերով դրոշմավորված արտադրանքի իրացումը:

Իր հերթին, «Վարչական իրավախախտումների վերաբերյալ» ՀՀ օրենսգրքի 170.12-րդ հոդվածի համաձայն. «Հայաստանի Հանրապետության կառավարության սահմանած՝ որոշակի թվագրումով դրոշմանիշերով և (կամ) հսկիչ նշաններով (դրոշմապիտակներով) դրոշմավորված ապրանքների իրացման թույլատրելի ժամկետներից հետո այդպիսի ապրանքներ իրացնելը, եթե դրանց ընդհանուր արժեքը վաճառողի մոտ նշված (իսկ չնշված լինելու դեպքում՝ օրենսդրությամբ սահմանված կարգով որոշված) գներով չի գերազանցում հիսուն հազար դրամը՝ առաջացնում է տուգանքի նշանակում՝ սահմանված նվազագույն աշխատավարձի վեցհարյուրապատիկի չափով»:

Քննարկվող դեպքում Կենտրոնի ՀՏ կողմից իրականացված ստուգմամբ հիմնավորվել է «2011» թվագրմամբ ակցիզային դրոշմանիշով դրոշմավորված արտադրանքի իրացման, հետևապես նաև ընկերության կողմից ՀՀ կառավարության 22 ապրիլի 2015 թվականի N 416-Ն որոշման 2-րդ կետի պահանջների խախտման փաստը: Արձանագրված խախտման վերաբերյալ «Վարչական իրավախախտումների վերաբերյալ» ՀՀ օրենսգրքով սահմանված կարգով հարուցվել է վարչական վարույթ, որի արդյունքում ՀՀ ԿԱ ՊԵԿ աշխատակազմի իրավաբանական վարչության պետի կողմից 08.04.2016թ-ին ընդունվել է վարչական իրավախախտման գործի վերաբերյալ թիվ 317485/02 որոշումը՝ «Վարչական իրավախախտումների վերաբերյալ» ՀՀ օրենսգրքի 170.12-րդ հոդվածի հատկանիշներով ընկերության տնօրենին վարչական պատասխանատվության ենթարկելու վերաբերյալ:

Ելնելով վերոգրյալից՝ Հանձնաժողովը գտնում է, որ Որոշումն ընդունվել է ՀՀ օրենսդրության պահանջներին համապատասխան, հիմնավոր է և ենթակա է կատարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

ՀՀ ԿԱ ՊԵԿ աշխատակազմի իրավաբանական վարչության պետի 08.04.2016թ. թիվ 317485/02 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ